


## NA MBONGO TE TO YA OFELE

 Ezali mpenza litomba koya lisusu na tabernacle, na ntongo oyo. Nazali bobele komituna . . . Ndeko Neville alobaki ete bato mingi bazalaki koyoka te, kuna na sima. Bozali koyoka ngai malamumu mpenza sikawa, kuna na sima? Ezali malamumu? Malamumu. Nazali—nazali moke mingi, yango wana nasengeli kosala makelele mingi mpo bato báyebe ete nazali awa.

<sup>2</sup> Na bongo, namikaniseli mokolo moko, ntango nazalaki kosala na Services Publics. Nazalaki komata ba-escalier . . . Nazaláká kolata sapáto ya monene mpenza, ezalaki na basété, mpo nazaláká kotambola mingi mpo na kosenzela basinga ya courant ya makasi. Nazalaki komata ba-escalier. Pe Mme Ehalt, oyo azali moninga na ngai, azalaki liboso na tableau de distribution. Nandimisami ete M. Ginther, kuna, ayebi ye malamumu mpenza. Na bongo, Edith alobaki: “Billy, ozali kosala makelele makasi, koleka nyonso oyo namóná, mpo na moto ya moke lokola yo.” Mpo basété minene wana ezalaki kosala makelele, ntango nazalaki komata ba-escalier.

<sup>3</sup> Nalobaki: “Ee, Edith, nazali moke mingi, nasengeli kosala ete bato báyebe ete nazali awa, kosala makelele mingi.”

<sup>4</sup> Ee, nakotaki kuna mpo nábenga. Ndeko Neville ayebisaki ngai ete moninga na biso malamumu, Ndeko Roy Roberson, ayei te na liyangani ya ntongo ya lelo, mpo azali kobéla. Oyo ya ye . . . Azali na líno moko na nse ya líno mosusu. Ekoti infection, pe epesi ye mwa fièvre. Pe nakanisi ete asengeli kolongolisa yango noki-noki. Pe Roy azali lokola tata, mpo na biso awa, pe tolingi ye. Pe nalobaki: “Ndeko Roy, na—nalingi kokota sikawa, etikali moke, na liyangani.” Nalobaki: “Nakosenga na losambo ete biso nyonso tóbóndela mpo na yo na ntongo oyo,” pe lobi, ntango akokende kuna, mpo na kosalisa yango. Líno yango ebimá na pembeni, to eloko moko ya ndenge wana, ebimá mabe, pe basengeli kokata yango, pe kolongola yango.

<sup>5</sup> Ndeko Roy azali ancien combatant, ndenge bino nyonso boyebi yango, ya Deuxième Guerre Mondiale, azuáká masasi ebele na nzoto. Pe soki ézalaka bolamu na Nzambe te, alingaki kozala ata na bomoi te. Alalaki esika moko ná bibembe, ntango molai; maboko na ye epanzanaki awa, makolo na ye pe epanzanaki, pe misísá na ye nyonso bibale ya minene ebebaki. Pe monganga alobaki: “Soki esalemi ete ábika, akotambola lisusu ata moke te.” Na ngolu na Nzambe, azali kosala mosala mikolo nyonso, komata, pe nyonso wana. Nzambe azali malamumu mpo na ye mpo azali moto malamumu, pe biso tolingi ye. Pe biso nyonso, tozali—tozali te . . .

<sup>6</sup> Soki tozali kobika na sembo, elingi koloba te ete mpasi ekokómela biso lisusu te. Na bosolo, elingi koloba ete bampasi ya ndenge na ndenge ekolanda biso. “Mpamba te, bampasi ya moyengebene ezali mingi, kasi Nzambe abikisaka ye na yango nyonso.” Ngámbo ya nkembo nde yango wana.

<sup>7</sup> Na bongo, na ntongo ya lelo, tokosenga libondeli ya ndenge mosusu, mpo na Ndeko Roy. Nazali komituna soki bato mosusu bazali awa, oyo balingi tóbondela mpo na bango, oyo balingi ete tókanisa bango na libondeli? Soki bakoki bobele kotombola maboko. Malamu. Ezali malamu. Tótelema mwa moke, soki bolingi, wana tozali kobondela.

<sup>8</sup> Nkolo, toyei lelo, na ebandeli ya sabata. Pe moi ezali kotambola sikawa, mpo na koleka likolo na mokili mobimba, mpo na kopesa pole pe bomoi na biloko oyo yango etindámá mpo épésá bango yango. Pe na ebandeli ya liyangani oyo. . . Tozali eteni ya Lingomba na Yo, oyo ebéngámá mpo na kosala mayangani ya kobondela mpo na babeli, mpo na lobiko ya nzoto; mpo na kokokisa likanisi pe mposa ya molingami Nkolo na biso, Oyo azokisamaki mpo na masumu na biso, pe na mapipi na Ye biso tosilá kobikisama. Pe tokosenga, na ebandeli ya liyangani, wana ezali kobanda, na banzembo, pe wana mitema na biso ebandi kotómbwama, ete tókanisa, na ntongo ya lelo, Nkolo, ndeko na biso ya motuya, molingami Roy Roberson, mosali na Yo ya komikitisa. Toyebi ete Obatelaki bomoi na ye na kati ya bitumba, pe Ozalaki malamu mpo na ye. Kasi lelo, azali kobela, na lolenge ete akoki koya na losambo te.

<sup>9</sup> Pe, Nkolo, wana bazalaki kobondela na ndako ya Jean-Marc, Mwanje moko akitaki na bolóko, na esika oyo bakangaki Petelo, afungolaki bikuke na lolenge ya kokamwa, pe abimisaki ye.

<sup>10</sup> E Nkolo, Ozali kaka Nzambe. Banje wana babelemi mpo na kokokisa mitíndo na Yo na ntongo oyo. Tobondeli, Nkolo, ete, wana tozali kobondela awa, na ndako ya Nzambe, ete Banje bákita na ndako ya Ndeko Roberson. Mposa na ye ezali ete ázala na esika na ye awa, kasi mpasi yango ekangi ye. Tika ete Banje ya Nzambe bákangola ye, bikisa ye, mpo ákoka kozua lisusu esika na ye na ndako ya Nzambe.

<sup>11</sup> Bamosusu bazali, oyo bazali koleka na mpasi, ba—bazali na bokono. Pe tomonaki mobange mwasi moko, ntango alingaki kofanda, atombolaki maboko, wana makolo na ye ezalaki kolénga. Ayei na ndako ya Nzambe, mpo na kobikisama. Nkolo, sala ete wana akobima, átámbola na mpíko nyonso, lokola elenge mwasi.

<sup>12</sup> Bato mosusu nyonso, oyo batombolaki maboko, maboko mingi etombwamaki, mpo ekomami, pe esilá kolobama ete “Bampasi ya moyengebene ezali mingi, kasi Nzambe abikisaka ye na yango nyonso.” Tika ete tópumbwa mosika lelo, kino na kondima, na maboko ya kondima, oyo ekokangola biso na

bokono nyonso pe na mpasi nyonso. Ntango liyangani ekosila, tika ete moto na bolembu ata moko te ázala kati na biso.

<sup>13</sup> Nkolo, sala ete mozangi kondima nyonso ákóma mondimi. Pe wana tozali komaniola Liloba na Yo, tika ete Molimo Mosantu ázua Yango, ákotisa Yango na mitema na biso, pe kuna, ásopela Yango mai kino ete Ékóma mbuma ya Liloba. Salela biso yango, Nkolo, wana togumbi mitó na komikitisa pe tosengi yango na Nkombo na Yesu. Amen.

Bokoki kofanda.

<sup>14</sup> Liboso tókóta na liteya ya liyangani ya ntongo ya lelo, nakolinga kokanisela bino likambo oyo, na mua bokebi. Soki bamosusu kati na bino, oyo bazali na lói, balingi kozala na moko na mayangani oyo ekosalema na Middletown, na Ohio, ekobanda mokolo ya lendí, sima na mpóso moko, ekozala na ba-terrain ya camping.

<sup>15</sup> Gene, oyebi nkombo ya ba-terrain ya camping yango? [Ndeko Gene alobi: “Balobaki ete ezali na ntáká ya kilometre zomi na libwa libanda na Middletown.”—N.D.E.] Ndeko Sullivan. Middletown ezali engumba ya moke, nabanzi ete ekokani mwa moke na engumba ya Jeffersonville oyo. Ezali na esika ya masano ya basketball. Ndeko Sullivan azali mokengeli kuna. Moto nyonso ya lingomba ya Litóndi ya Nsango-malamu, mpo tozali na mangomba koleka ntuku motoba oyo eyokani mpo na kosala mayangani yango, akoki koyebisa bino esika ba-terrain ya camping yango ezali.

<sup>16</sup> Bandako ya mike mingi ekozala na ba-terrain ya camping yango, ndenge bayebisi ngai, mpo na koyamba bato oyo bakolinga koya. Pe mayangani yango ekobanda mokolo ya lendí, kino mokolo ya mpóso, mikolo motoba. Ekozala mokolo ya lomingo te, mpo bato ya mangomba mosusu bákoka kokende kosala mayangani na bango ndenge bamesaná. Ntango mosusu mayangani ya lobiko ya nzoto ekozala, to mabondeli mpo na babeli, na mpokwa nyonso. Pe moto nyonso akoki koya. Ekobanda mokolo mwa 10 na sanza ya mwambe, kino mokolo mwa 15, kobanda mokolo ya lendí kino mokolo ya mpóso. Soki ozali na lói, pe—pe lói na yo ekómi pene, pe osepeli kolekisa yango ndenge wana, ee, tokozala na esengo ya koyamba yo.

<sup>17</sup> Nakolinga pe koléndisa bato nyonso oyo babatisami naino te na libatizi ya Baklisto, ete bítikala awa na ntongo ya lelo pe bákánisa malamau na ntina na yango. Pe bómilengela mpo na mosala ya libatizi oyo ekosalema sima na miníti ntuku minei na mitano, nabanzi. Ekosalema awa na losambo.

<sup>18</sup> Tozalaka na mposa makasi ya koléndisa bato mpo bábátisama na libatizi ya Baklisto, koyeba ete ezali na motuya monene mpo na lobiko. Mpamba te ekomamaki na Nkolo na biso, na etínda na Ye ya suka, na etínda ya suka oyo Apesaki na Lingomba. To, ntango Apesaki etínda ya suka na Lingomba,

Alobaki: “Bókende na mokili mobimba, pe bótéya Nsango-malamu na bikelamo nyonso. Moto oyo akondima pe akozua libatishi akobikisama.” Na bongo, toyebi ete ezali na motuya monene ete tóbatisama na kozindisama na mai.

<sup>19</sup> Pe tokozala na esengo ya kosala mosala yango mpo na bino, mpo na moto nyonso oyo andimisami na motema na ye ete Yesu Klisto azali Mwana na Nzambe, ete Akufaki mpo na kobikisa basumuki, pe ozali moko na baoyo Akufelaki mpo na kobikisa bango; pe olingi koya kozua libatishi na Nkombo na Yesu Klisto mpo na bolimbisi ya masumu na yo; mpo na kotalisa na mokili ete ondimi ete masumu na yo elimbisami, pe sikawa olingi kokóma moyekoli ya Nkolo Yesu, mpo ótélema ngwi.

<sup>20</sup> Soki ozali na losambo ya kokende te, tokozala na esengo ya koyamba yo mpo ósangana na biso. Tozali na moziki ya bandimi ya lingomba awa te. Ezali losambo oyo efungwámá, mpo na koyamba bato nyonso oyo bazali kati na Nzoto na Klisto, bato ya ebongiseli nyonso. Tozali losambo oyo eponaka bibongiseli te. Pe tofungolaka bikuke mpo na bato nyonso, ata soki bazali banani; totalaka lángi te, lopo te, to endimeli te. Moto nyonso akoki koya. “Moto oyo alingi, áyá.” Pe soki ozali na losambo mosusu te, tokosepela ete óyá kosangana elongo na biso. Eloko ya kokota kati na yango ezali te. Yáká bobele, wana bikuke efungwami, pe sangáná elongo na biso. Yango nde nyonso oyo osengeli na yango; yáká bobele bongo. Yáká na motema polele, yaka kotiya loboko, pe ósunga biso wana tozali kokoba mosala mpo na Bokonzi na Nzambe. Mpamba te tondimi mpenza ete ntango ekómi mpenza na suka, ete ezali ntango oyo makambo nyonso oyo elobami na Biblia ekokokisama.

<sup>21</sup> Na ntembe te, mingi kati na bino batángaki maloba ya Khrushchev, oyo alobaki na O.N.U., mokolo mosusu, ndenge moninga moko atángelaki ngai yango na zulunále moko ya Canada. Alobaki: “Soki Nzambe moko azali, Azali komiléngela mpo na kokómbola pe kopétola lisusu tempelo, ná bino ba-capitaliste, ndenge Asalaki na ebandeli.” Na bongo, sikawa, bokoki kotánga kati-kati na milongo, “Azali komilengela mpo na kokómbola lisusu tempelo.” Pe ezali nsomo, communiste moko nde asengeli koloba likambo ya ndenge wana? Ata bongo, azalaki na eloko moko. Ya solo. Na ebandeli, ba-capitaliste nde babandaki mindondo. Bisó tozali ba-capitaliste.

<sup>22</sup> Nayokaki molingami mokengeli na biso ya motuya, Ndeko Neville, kolobela likambo moko na ntina na emission na ye ya television. . . to ya radio, na ntongo mosusu wana, likambo yango ezali mbala na mbala kozongela ngai na makanisi. Nazali kokoka kobosana yango te. Nayebisaki yango moninga na ngai moko, lobi na mpokwa. Pe ezalaki boye, ete ekozala na . . . Wana Molimo Mosantu ekolongolama na mokili, mangomba wana ya basambeli ya maloba bakokoba bobele ndenge bamesáná, bakoyeba bokeseni te. Bosilá mpenza, bo. . . Bato boni bayokaki

yango? [Losambo balobi: “Amen”—N.D.E.] Ezalaki likambo ya kokamwa te? Bayebi Molimo Mosantu te, na bongo, bakoyeba te ntango Yango ekosila kokende, pe bakokoba na bango kozala ndenge bamesana. Ntango moto ya suka akosila kotiyama elembo kati na Nzoto na Klisto, bango bakokoba kaka ndenge wana, bakoluka kobongolisa bato mitema epai na Yango, mpo bayebi te oyo Yango ezali. Pe balosambo na bango ya maloba ekokoba kozala bobele ndenge ezalaka. Sikawa, ntango mosusu ezindi mpenza kati na bino te, ndenge ezindaki kati na ngai, kasi ezalaki mpenza maloba ya kokamwa. Mpo bakokende mpenza mosika, kati na milúlú ya basambeli, na lolenge ete bakomitungisa te ndenge bazangi Molimo Mosantu, mpamba te bayebi te oyo Yango azali, mpo na kobanda.

<sup>23</sup> Nzambe áyókela biso mawa. Ndeko, nakosepela kobika na bomoi oyo, pe yango nde mposa na ngai, na lolenge ete soki nayokisi Ye ata mwa mawa moke, náyéba yango na motema na ngai. Soki nasali likambo oyo eyokisi Ye mawa, nákoka koyeba yango na mbala moko.

<sup>24</sup> Bongo, ntango Akozala te; naboi kozala awa, ntango Ye akozala awa te. Nalingi ete ngai pe názala nasí nakendé, na ntango wana, iyo, misie, mpo Makila ekozala lisusu te, na ebonga na mawa. Ekozala molílí, mólinga pe móindo. Na esika ya búlee, Molobeli akozala kuna te, mpo na kolobela biso, na ntango wana. Boyebi ete Makomi elobi yango? Esika ya búlee ezalaki kobimisa mílinga. Makila ezalaki te na ebonga na mawa, bongo, ekómi ntango ya kosambisama.

<sup>25</sup> Soki Nkolo apesi biso mwa bampókwa mpo na mayangani ya kolamuka, na ntango moko boye, na ebandeli ya eleko ya automne oyo. Nauti kozua mokano, nazali na mposa ya kozua Buku oyo ya Emoniseli, mpo na koyekola yango, Buku mobimba ya Emoniseli.

<sup>26</sup> Sikawa, lelo, nayebi ete bato mingi bayei mpo tóbondela mpo na bango. Pe biró na ngai ezalaki ya kokangama lelo, to na mpóso oyo. Pe bato mosusu bayaki awa, bazuaki libaku te ete moto ábóndela mpo na bango, kuna, mpo bandeko bakendeki kopema, mokolo moko to eloko moko bongo. Bazalaka na mosala mingi ya kosala; misala na bango moko, bakísá mosala ya tabernacle, pe bambélá na ngai na telephone pe nyonso wana. Noki-noki, okolemba mingi. Na bongo, ezalaki nde na ntina wana. Nayebi ete nasengeli kobima pe kokende esika mosusu, mbala na mbala, kosala likambo ya ndenge mosusu, pe nayebi ete bango pe basalaka yango. Bongo, babengaki ngai. Nalobaki: “Namoni ete ekozala malamú.” Pe tokobondela mpo na babeli, sima na mwa ntango.

<sup>27</sup> Pe nakanisaki ete tokotángá Liloba na Nzambe mwa moke. Soki ozali na Biblia na yo sikawa, tózua Buku ya Yisaya. Nasepelaka komona bino kozua Buku pe kotángá Yango.

Nakotángá . . . Ata soki totángi bobele Liloba moko to mibale, ata bongo, Ezali Liloba na Nzambe ya Seko, oyo Ekokufa te. Ekoki koleka ata moke te. Mokapo ya 55 ya Yisaya, motó ya liteya: “Lobiko ya seko.”

*Ee, bino nyonso oyo bozali na mposa ya mai, bóyá epai mai ezali, pe ye oyo azali na mbongo te; bóyá, bósómba, pe bólia; ee, bóyá, bósómba vinyo . . . míliki na mbongo te, ya ofele.*

*Mpo na nini bokosilisa mbongo mpo na eloko oyo ezali lípa te? pe mpo na nini bozali koboma nzoto mpo na eloko oyo ezali kotóndisa te? bóyóka ngai na bokebi, pe bólia eloko oyo ezali malamú, pe molimo na bino ésepela mpenza na biloko ya mafuta.*

*Bósembola litoi na bino, pe bóyá epai na ngai: bóyóka, pe molimo na bino ekotikala na bomoi; pe nakosala na bino kondimana ya seko, oyo boboto na ngai mpo na Dawidi.*

28 Nakosepela kosolola na bino, na ntango moke, likolo na: *Na Mbongo Te To Ya Ofele.*

29 Biloko mpo na kolekisa ntango ekómi mpenza mingi na ntango na biso. Makambo ekómi mpenza mingi mpo na kobenda bato na oyo tobengaka “bisengo,” pe ezali mpo na bato nyonso, ya mibu nyonso.

30 Makambo ezali oyo ebendaka bilenge, mabína ya mikolo oyo, baféti ya rock-and-roll, ná mizíki oyo bazali na yango, oyo etambolaka na yango. Pe nyonso wana ezali kobenda bokebi, mpo na kolekisa ntango.

31 Ata soki mwana akólí na ndako ya malamú ndenge nini, pe ata soki balakisi ye kosala makambo ya malamú ndenge nini; soki mwana yango ayambi lobiko ya Mbótámá ya sika te, mizíki ya rock-and-roll ekobenda bokebi na ye noki, bobele ntango ayoki yango. Mpo, kati na ye, esilá kobótama kati na ye, na lolenge na yango, molimo ya mosuni. Pe nguya ya zabolo ekómi mpenza makasi, lelo, na lolenge ete ekokanga molimo ya mwana wana.

32 Pe, na bongo, koleka boni ekosala yango epai na mokóló, oyo aboi Mbótámá ya sika! Mpamba te, soki bomoi na yo ebongwani te, obongwani te pe obotami mbala ya sika te, na Bokonzi ya Nzambe; lolenge na yo ekozala kaka ya makambo ya mokili, ata soki ozali mosambeli ya ndenge nini, soki yango ebongwani te kati na yo. Okoki kokúmbamela pe kozala mosambeli, kasi ata bongo, yango ekozala kaka na nguya moko oyo ekobanda kobenda yo, mpo moto ya kala, oyo ya masumu, ná bamposa na ye, akufi naino te kati na yo.

33 Kasi bobele ntango Klisto azui bokonzi na motema na yo, biloko wana ekotungisa te. Yango ezali monene mingi koleka.

34 Nakoki kotánga nkombo ya mobali yango te, mpo nabosani nkombo na ye sikawa, kasi mingi kati na bino bakoyeba ye. Balobaka ete esanga moko ezalaki, oyo mibali bazalaki kokende kobátama, mpo na kobimela bato na pwasa, pe basi bazalaki kobima, wana bazali koyemba. Pe banzembo na bango ezalaki kobenda bokebi mingi, na lolenge ete bato ya masuwa oyo bazalaki koleka pembeni, na kati ya ba-masuwa, bazalaki kopusana wana. Na sima, basodá oyo babátamaki bazalaki—bazalaki kokanga bato yango ya masuwa na mbálákáká, pe bazalaki kokata bango kingo. Bongo moto monene moko alingaki koleka pembeni wana. Pe ayebisaki basali ya masuwa na ye ete bákanga ye na likonzi ya monene, pe—pe—pe bákotisa eloko moko na monoko na ye, mpo ágánga te; pe—pe bakotisaki biloko na matoi ya basali ya masuwa na ye, mpo báyoKa te, pe mpo báleka pembeni wana, mpo na koyoka yango. Pe basi yango babimaki, bazalaki kobína pe—pe kogánga, wana bazalaki koyemba. Pe, oh, ezalaki kitoko mingi mpenza, na lolenge ete abandaki kobalola maboko na ye, wana azalaki koganga makasi epai ya basali ya masuwa na ye: “Bókóta kuna! Bókóta kuna!” Kasi bazalaki koyoka ye te, bazalaki na biloko na matoi na bango.

35 Na sima, alekaki kino na esika moko, oyo basengelaki kokangola ye na likonzi yango, to kofungola maboko na ye, pe asengelaki kolongola biloko oyo ekangaki matoi na bango. Kuna, ntango azalaki kotambola na ba-balabala, ayokaki alángá-nzembo moko ya malamum mingi mpenza, koleka baoyo ya esanga, na lolenge ete ntango alekaki lisusu pembeni na esanga wana, balobaki: “Oh, moi-mobémbo, tókanga yo lisusu na likonzi monene ya masuwa?”

36 Alobaki: “Te, bókanga ngai te. Nasili koyoka eloko moko ya malamum mingi koleka, na lolenge ete yango ekotungisa ngai lisusu te.”

37 Ezali ndenge wana mpo na Moklisto oyo abotami mbala ya sika. Basili kozua eloko moko ya monene mingi koleka barock-and-roll pe bisengo ya mokili oyo. Molimo Mosantu nde esepelisaka bango. Yango ezali monene mingi koleka, na lolenge ete, mpo na bango, mokili esílá kokufa.

38 Kasi soki okei kolekisa ntango na bisengo oyo ya motuya moke, osengeli koyeba ete otindami komema mbongo mingi. Elenge mobali oyo akomema moninga na ye ya mwasi na baféti wana, na mabína wana, pe bongo na bongo, akofuta mbongo mingi ya lifúti na ye ya mpóso mobimba. Pe mikóló oyo balukaka bisengo na bisika ya milángwá, mpo na kolongola mawa na bango ya mpóso mobimba na nzela ya masanga, bakosengela kofuta mbongo mingi. Kasi epesaka bango nini? Bazuaka eloko mosusu te, bobele mawa na motema.

<sup>39</sup> Pe bómikanisela, mokolo moko, bosengeli kosukisa makambo ná Nzambe mpo na yango. “Pe lifúti ya masumu ezali liwa.” Na nzela na yango, bokosala eloko moko te awa na mokili. Ezali eloko ya lokuta. Masanga ekobakisa bobele mawa. Masumu ekobakisa bobele liwa likolo na liwa. Lifúti na bino ya suka ekozala bokabwani na Nzambe, mpo na Seko, kino na Libeke na Mító. Pe bokoki kozua eloko moko te, kasi bokozanga nde.

<sup>40</sup> Na sima, Nzambe ayei kotuna motuna oyo: “Mpo na nini bozali kosilisa mbongo na bino na biloko oyo etóndisaka te? Mpo na nini bosalaka bongo?”

<sup>41</sup> Eloko nini esalaka ete moto álinga kosala bongo? Basilisaka nyonso oyo bazali na yango, nyonso oyo bakoki kofuta bango, mpo na kosomba masanga, mpo na kolatisa mwasi oyo abimaka na ye, to mpo na bisengo moko boye ya bilúlélá ya mokili.

<sup>42</sup> Kasi Biblia elobi na biso, pe tobengami epai na Nzambe: “Mpo tósómba esengo ya Seko pe Bomoí na Seko, na mbongo te to ya ofele.”

<sup>43</sup> Biloko wana ekoki kotóndisa te, pe suka na bango ezali liwa ya Seko. Pe ekolia yo mbongo nyonso oyo okoki kosangisa, mpo ókóma mo—moto monene to artiste, to mosekisi, to nyonso oyo okoki kokóma, to mwasi oyo ayebani, to nini. Ekolia yo nyonso oyo okoki kosangisa, mpo na kosala bongo. Kolata bilamba ya ntalo mingi, pe—pe kosala makambo oyo mokili esalaka, bobele mpo na kobúka lifuti ya etúmbu ya Seko.

<sup>44</sup> Na bongo, Nzambe alobi: “Mpo na nini?” Tokosala nini na Mokolo ya Kosambisama, ntango baktuna biso mpo na nini tosalaki bongo? Eyano na biso ekozala nini? Eyano na America ya mikolo oyo ekozala nini, oyo emibengaka ekólo ya Baklisto? Mbongo ebele koleka ezali kobebisama na whisky, na mobu moko, koleka oyo ya bilei. “Mpo na nini kosilisa mbongo na bino mpo na biloko ya ndenge wana?” Nzokande, letá ekoki kobwaka yo na bolóko, mpo na dollar mitano ya mpáko, oyo otindaki, ntango mosusu, na esika oyo etiámá na molongó ya malamau te mpo na koyamba mpáko, mpo na kotinda ba-missionnaire na mikili mosusu. Mokolo moko baktuna biso: “Mpo na nini bosalaki bongo?”

<sup>45</sup> Tozali ekólo ya Baklisto, pe tozali kotinda ba-milliard na bato wana, kuna, oyo tozali koluka kosomba bondeko epai na bango na mbongo. Sikawa, bakómi koboya yango. Kokamwa te ete Khrouchtchev alobaki: “Soki Nzambe moko azali, Akokómbola lisusu ndako na Ye mpo na kopetola yango.” Bapakáno bakomi koloba maloba ya boye, mpo na koyokisa biso nsoni. Ezali mpenza likambo ya nsoni! Pe tozali komibenga Baklisto.

<sup>46</sup> Nzambe alobi: “Bóyá kosomba Bomoí na Seko; na mbongo te, ya ofele.” Bomoí mpo na kobika libela, kasi tozali kopesa Yango



mokongo pe koseka na miso na Ye. Na Mokolo wana, tokosala nini? Ekozala ndenge . . . ?

47 Soki Nzambe apesi biso makambo ya kosala, apesi biso mbongo pe akómisi biso ekólo oyo eleki bikolo nyonso na mbongo na nse na mói oyo, na bongo Nzambe akotuna biso soki tosalaki na yango nini. Mpo na nini tozali kosilisa mbongo na biso mpo na biloko oyo etóndisaka te? Akotuna bobele ekólo te, kasi moto moko moko; kobanda na ba-centimes, kino na ba-millió ya ba-dollar, oyo ekopesamela moto moko moko.

48 Nzokande bato bazali kobomana. Nauti kotánga likambo moko, na mikolo eleki awa, oyo bilenge mibali mibale bazalaki kosala na moláko moko ya bokila. Moko azalaki na bana mitano, mosusu azalaki na bango mibale. Pe basilaki kolongola moko na bango na mosala. Pe moko na bilenge mibali yango oyo azalaki na bana mibale, to oyo azalaki na bana mitano, amonaki ete ye nde asengelaki na mosala yango, koleka oyo azalaki na bana mibale; pe akendeki na bokila elongo na ye, pe abetaki ye masasi na mokongo.

49 Mbongo, wana nde lolenge ya ekólo, wana nde lolenge ya makanisi, wana nde lolenge ya molimo oyo ezali kokonza bato.

50 Na bongo, bokoki komona motuya nini Mbótámá ya sika esengeli kozala na yango. “Bosengeli kobótama mbala ya sika.” Esengeli kosalema. “Bóyá epai na Ngai, pe bósómba na mbongo te.”

51 Okoki koloba te: “Nazalaki na mbongo te.” Ozali na ntina ya mbongo ata moke te. Ezali kopesama ofele.

52 Bisó bato ya Amerika, tomesaná kofuta mbongo mpo na eloko nyonso oyo tozali na mposa na yango. Yango nde slogan na biso. “Tofutaka mbongo mpo na biloko. Tozali na mbongo.” Totíndaka mbongo na biso na bikólo mosusu, oyo bazali babólá, pe bongo na bongo. Soki okei kuna, okomona ba-touriste bayei, bango nyonso balati kitoko mpenza. Bato ya Amerika baleisaka bango. Likambo yango ezali lokósó ya mbongo na miso ya Nzambe. Yango ekosombela biso nzela ya Lola te. Kasi biloko nyonso na Amerika, tosengeli kofuta mbongo mpo na kozua yango.

53 Okei na restaurant, mpo na kolia. Kasi soki otiki mbongo na mesa te, mpo na kokabela mwasi oyo ayelaki yo bilei, okomona ye akangi elongi, atako bafutaka ye na kompaní oyo asalaka. Pe ekozala malamú ete ópésa ye moko na zomi, to koleka, ya mbongo oyo ofuti mpo na bilei nyonso. Soki te, mwasi yango akodongola yo lokola moto ya lokósó to moto oyo a—akabaka te. Nzokande, azuaka lifúti na ye. Nakanisi ete, kosala bongo, ezali kozanga lokumu pe nsoni. Nakanisi ete ezali kozanga lokumu oyo ekólo esengeli kozala na yango. Kala, bato malamú, na bisika ya malamú, bazaláká kotika te ete esalema. Kasi nyonso ezali kokóma se molimo moko ya monene.

54 Nazalaki na mobembo, na engunduka. Pe momemi biloko moko. . . Namemaki sakósi ya moke na loboko moko, valísi na loboko mosusu, ná mwa sakósi ya biloko ya kokata mandefu na nse ya lipeka, pe nazalaki kotambola. Momemi biloko yango apusanaki pe alobaki: “Nakoki komemela yo yango?”

55 Nalobaki: “Oh, nazali kokende bobele awa, na engunduka, misie. Melesí mingi.” Bobele na ntáká ya metre penepene, oh, ntuku mibale na nsambo.

56 Alobaki: “Nakomema yango,” pe azuaki oyo ya moke, atómbolaki yango, pe akendeki.

57 Ee, ntango akómaki, namilobelaki: “Ntango mosusu ngai. . . Nayebaki ete bafutaka ye, kasi nakopesa ye ata—kopesa ye ata centime ntuku mitano. Ntango mosusu, amemaki biloko na ngai, tóloba, penepene miníti moko; penepene kino na suka ya tabernacle oyo, esika engunduka ezalaki. Namataki naino na engunduka, nasembolaki loboko na nse pe nazuaki yango. Napesaki ye centime ntuku mitano.

Alobaki: “Zela naino!”

Nalobaki: “Likambo nini, misie?”

Alobaki: “Namemelaki yo sandúku misato!”

Nalobaki: “Iyo, misie, ezali bongo. Likambo, likambo nini?”

58 Alobaki: “Ntalo na ngai ya nse ezali centime ntuku mibale na mitano na sandúku moko. Osengeli kopesa ngai lisusu centime ntuku mibale na mitano.”

Bomoni, yango nde lolenge ya bato ya Amerika, osengeli kofuta mpo na eloko nyonso.

59 Soki okei kotambola na motuka na yo pe ekwei na libulu, pe ozui moto moko mpo abimisa yo na libulu. Ekozala malamu ete ómilengela mpo na kofuta, mpo akofutisa yo mpo na yango. Soki motuka oyo ebendaka nde eyei kobimisa yo, akofutisa yo mpo na kilometre moko moko. Pe soki mosali bilanga moko abimisi motuka na ye ya mosala ya bilanga, mbala libwa likolo na zomi, akofutisa yo mbongo mingi, koleka oyo wana.

60 Osengeli kofuta mpo na eloko nyonso oyo basaleli yo. Nyonso ezali kaka: “Futa! Mbongo! Futa! Mbongo!”

61 Nzokande koleka boni libulu ya monene koleka oyo masumu esili kobwaka yo! Nani akokaki mpenza kobimisa yo na libulu ya masumu? Kasi Nzambe abimisi yo na libulu ya masumu, na mbongo te, ofele, na ntango oyo moto moko te akokaki kobimisa yo.

62 Soki ofuti mbongo mingi te mpo na motuka ébenda yo, okotikala na libulu. Osengeli kozala na mbongo, soki te okotikala na libulu.

63 Kasi libulu ya mabe koleka oyo osílá kokota, ezali oyo zabolo abwakaki yo kati na yango, libulu ya masumu pe ya

kozanga kondima. Nzambe, na motema malamu, akobimisa yo, na mbongo te, ofele. Kasi, ofandi kati na libulu, ozali komipota na masumu, pe ozali ata kobelela Ye te.

<sup>64</sup> Soki ozui motuka ya kobenda, na momesano, bakitisaka monyolólo moko ya monene kino na kati ya libulu, bazíngaka yango na pare-chocs, to na nini, pe babandaka kobalola manivéle. Pe nguya ya motuka yango ebandi kobenda, ba-moteur na yango ebandi kosala, pe ebimisi yo.

<sup>65</sup> Ntango Nzambe akuti yo kati na libulu ya masumu, pe Ayoki ndenge ozali kobelela Ye, Akitisaki monyolólo moko oyo ezingaki Kalvari, bolingo na Nzambe, Akangisi Yango na motema na yo, pe Atii Nguya ya Molimo Mosantu kuna, mpo ébanda kobenda. Kasi okofuta eloko moko te. Kasi ata bongo tofandi kati na libulu, mpo tozangi makoki ya kofuta yango biso moko. Bisu bato ya Amerika tokanisaka ete tokoki kofuta yango biso moko, kasi bokokoka te. Ezali na mbongo te to ya ofele. Bafutaka yango na lingomba te. Yesu nde afutaki yango na Kalvari. Kasi bato bazali koyoka nsoni mpo na Yango. Balingi kozua Yango na lolenge oyo ya bango. Nzambe asílá kobongisa lolenge moko mpo ózua Yango, pe ezali ya ofele, soki olingi kozua Yango.

<sup>66</sup> Na momesano, ntango babimisi yo na libulu, ozoki mpota na nzoto mobimba, osengeli kokende na lopitalo. Pe liboso bábanda kosalisa yo, liboso eloko moko esalema, baktuna yo: “Nani akofuta facture? Soki tokotonga bampota yango, soki tokosopela yango mafuta, pe kopesa yo bantonga mpo na—mpo na kopesa yo mángwelé mpo mikolóbe ékota na makila na yo te, ozali na assurance ya ndenge nini?” Liboso básala eloko moko, likambo ya mbongo esengeli kotiamana na mesa.

<sup>67</sup> Kasi soki Nkolo na biso azíngi motema na yo na monyolólo ya bolingo na Ye, pe Abimisi yo na libulu ya masumu, Abikisaka mitema nyonso oyo etútami, Alongolaka masumu nyonso. Pe facture na yango ebwakamaka na mbu ya kobosana, mpo Ámikanisela lisusu mabe na yo te. “Bóyá, na mbongo te to ya ofele.” Ata soki ozoki ndenge nini, ata soki otútami ndenge nini, ata soki libota na yo esali nini, to ata soki osalaki nini, facture na yango ezali te. Abikisaka mawa na mitema, Alongolaka mawa na bino nyonso. “Azokisamaki mpo na masumu na biso, Atútamaki mpo na mabe na biso; etumbu oyo epesaka biso kimia ezalaki likolo na Ye; pe na mapipi na Ye biso tosílá kobikisama.” Nyonso ezali ya ofele.

<sup>68</sup> Kasi tolingi koyamba Yango te, ezali mpo tokonzami na molimo mabe. Tokonzami na molimo ya ekólo, molimo ya mokili; na esika ya kokonzama na Molimo ya Nzambe, Molimo Mosantu, oyo etambwisaka biso pe ekambaka biso na Solo nyonso, pe oyo esalaka ete Biblia ékokisama.

<sup>69</sup> Eleki mwa ntango, nazalaki kosolola na mozangi kondima moko. Alobaki: “Kanisa naino, M. Branham. Mpasi nyonso ya

bomoi oyo, pe eloko bobele moko oyo tozali na yango, mpo na kotalisa ete tobikisami, ezali nde makomi ya kala, ya Bayuda.”

<sup>70</sup> “Oh,” nalobaki, “misie, ntango mosusu yango nde nyonso oyo yo ozali na yango, kasi ngai nazali na eloko mosusu oyo eleki yango. Nazali na Molimo ya Ye oyo akomaki Yango, oyo etatolaka Yango pe esalaka ete bilaka na Yango nyonso ékokisama.” Ayebacki ndenge ya koyamba yango te.

<sup>71</sup> Bomoni, bosengeli koya kosomba na mbongo te, kosomba ya ofele. Okofuta eloko moko te. Ezali ya ofele mpo na moto nyonso oyo alingi; áyá. Nzambe akobimisa yo na libulu.

<sup>72</sup> Ndakisa, mobali oyo azalaki pembeni na ekuke oyo bazalaki kobenga Kitoko. Zabolo abwakisaki ye na libulu, uta na libumu ya mama na ye, abukaki makolo na ye. Mpo ália, asengelaki kosenga-senga makabo ya motema mawa epai na bato oyo bazalaki koleka wana. Pe ndenge afandaki na ekuke na ntongo wana, amonaki batei mibale ya Pantekote bazali koya. Bazalaki ata na loméyá te, mpo alobaki: “Paláta, nazali na yango te.” Pe loméyá ezalaki mbongo ya moke koleka palata. “Paláta pe wólo, nazali na yango te.”

<sup>73</sup> Nakanisi ete mobali yango akanisaki eloko moko ya boye: “Ntina ya kozua kópo na ngai ezali te.” Ntango mosusu azalaki koluka kobomba mwa mbongo. Azalaki na mibu ntuku minei, pe ntango mosusu azalaki koluka kobomba mwa mbongo, mpo minganga básálela ye bibendé ya bibósono, ya kotambola na yango, mpo, ye, azalaki na bolembu nde na matíndí na ye. Pe ntango mosusu asengelaki kozala na mbongo yango, mpo áfuta yango, liboso minganga básalisa ye. Pe, na ntembe te, azalaki na ntina ya kosembola kópo na ye te, epai ya batei wana ya Pantekote, oyo bazalaki na eloko moko te. Libaku malamú oyo bango . . . azalaki mpenza mobólá, mpo azalaki koluka ete bato wana bápésa ye ata loméyá.

<sup>74</sup> Kasi ntango atalaki bango na miso! Moko azalaki elenge, pe azalaki kongenga na bolenge; oyo mosusu, mobange na maniúniúkú; ntango Yoane . . . ntango Petelo ná Yoane bakómaki na ekuke yango. Amonaki eloko moko kati na elenge mobali wana. Elingi koloba, kongenga yango elekaki oyo bilenge nyonso bazalaka na yango. Na nse ya maniúniúkú pe mitungisi ya mói ya Galilai, oyo esiláká kozikisa elongi ya mobange molóbi mbisi wana, amonaki “esengo oyo eleki maloba, pe oyo etondi na nkembo.” Amonaki eloko moko lokola ya mwa ndenge mosusu.

<sup>75</sup> Boyebi, Boklisto ezalaka na eloko moko boye, oyo esalaka ete bato bázala ndenge mosusu. Bango nde balekaka kitoko na mokili mobimba.

Pe azuaki kópo na ye kasi asembolaki yango te.

<sup>76</sup> Pe ntóma Petelo, lokola ye nde azalaki mokóló koleka, alobaki: “Paláta pe wólo, nazali na yango te.” Na elobeli mosusu: “Nakoki kosunga yo te, mpo ósómbe ba-béquille yango. Paláta

pe wólo, nazali na yango te, kasi oyo nazali na yango!” Autáká kosomba epai na Ye oyo azaláká na mafuta ya nzoi pe esengo ya vínyo ya lobiko. Mikolo mibale to misato liboso na yango, autaki na Pantekote, epai likambo moko eutaki kosalema.

<sup>77</sup> Pe elenge mobali yango azongisaki “amen” moko ya monene mpenza na maloba yango, pe atalaki ye na miso.

<sup>78</sup> Likambo nini esalemaki? Monyolólo wana ya mawa, ya mawa ya Ye oyo alobaki: “Nayokelaka babeli mawa,” bobele Molimo wana eutaki kozua esika na motema ya mobange molóbi mbisi wana. Alobaki: “Na oyo etali mbongo, nazali na yango te, kasi nazali na eloko moko oyo ekozua esika na yango mbala milió. Oyo nazali na yango!”

<sup>79</sup> Sikawa bokanisa, Petelo azalaki Moyuda, pe bango balingaka mbongo, na ndenge bazalaka, kasi Moyuda wana autaki kobongwana. Ezali te “oyo nazali na yango, nakotekela yo yango.”

<sup>80</sup> Kasi: “Oyo nazali na yango, nakopesa yo yango! Oyo nazali na yango! Nazali na loméyá na libenga na ngai te. Nakoki kosomba lípa te. Nakoki kosomba eloko moko te. Nazali ata na loméyá moko te. Kasi soki okoki koyamba yango, oyo nazali na yango, nakopesa yo yango, mpo epesamelaki ngai.” Yango nde tosengeli na yango. “Oyo nazali na yango, nakopesa yo yango.”

“Ozali na eloko nini, misie?”

<sup>81</sup> “Nauti epai na Ye oyo atekaka miliki pe mafuta ya nzoi, ya ofele. Nakopesa yo Yango. Okofuta ngai eloko moko te mpo na Yango. Soki okoki koyamba Yango, nakopesa yo Yango. Lokola moto oyo alingi kofutisa te, kasi lokola baoyo balingi kopesa.”

<sup>82</sup> Mpo: “Lokola bozui ofele, bópesa pe ofele.” Ezalaki etínda oyo Nkolo na ye autaki kopesa ye, bobele mikolo misato oyo eutaki koleka. “Bókende koteya Nsango-malamu na mokili mobimba. Ye oyo akondima pe akobatisama akobikisama; pe ye oyo akondima te, akokweisama. Bilembo oyo ekozala na baoyo bakondima: Na Nkombo na Ngai, bakobengana milimo mabe; bakoloba minoko na sika; soki bameli eloko oyo ebomaka, ekosala bango mabe soki moke te; soki balokoti banyoka, ekotungisa bango te. Lokola bozui ofele, bópésa pe ofele.” Moyuda wana asilaki kobongwana. [Ndeko Branham abeti eteyelo mbala minei—N.D.E.]

<sup>83</sup> Eloko tosengeli na yango na Amerika, ezali mbongwana, mpo Molimo Mosantu ézua esika ya mimesano na biso mosusu ya basambeli. “Lokola bozui ofele, bópésa pe ofele.”

<sup>84</sup> “Oyo nazali na yango, nakopesa yo yango. Na Nkombo na Yesu Klisto ya Nazarete, telema pe tambola,” kondimela Nkombo wana esangísámá te, ya Mokeli! Kokamwa te ndenge azalaki kodenda, kopumbwa pe kokumisa Nzambe, ntango azalaki kokende!

<sup>85</sup> Oh, boyebi makambo ya minene ezali ete, ntango mosusu asilaki kofanda wana mibu ntuku minei, azalaki komeka kosangisa mbongo oyo esengeli mpo ásómbe ba-béquille, kasi azalaki kokoka te. Kasi na esika oyo andimaki ata moke te, na ntango oyo andimaki te, pe na bato oyo andimaki ata moke te, pe oyo bakokaki ata moke te, nde azuaki eloko oyo azalaki koluka. Nasepeli mingi ndenge Nzambe asalaka makambo ndenge wana.

<sup>86</sup> Pe na mwa etónge moko ya bato oyo babengaka batúntuki, na mpokwa moko, nde nazuaki eloko oyo nazalaki koluka, oyo mbongo ekokaki kosomba te. Na etónge ya baínga, ya bato oyo batángá te, oyo balataki na ndenge ya bobola, bato moíndo, mpo na kobanda, kuna na mwa nganda moke ya kala oyo bautaki kobongola, na nse, nde nazuaki eloko ya motuya, paúni; ntango mobange moto moíndo wana atalaki ngai na miso, pe alobaki: “Osílá kozua Molimo Mosantu uta ondímá?” Oh, Ezalaki eloko oyo nazalaki koluka. Nandimaki te ete nakokuta Yango epai ya bato wana, kasi bazalaki na eloko oyo ngai nasengelaki na yango.

<sup>87</sup> O.N.U. lelo, bakolinga koyamba eloko oyo biso tozali na yango te, kasi yango nde basengeli na yango. Khrouchtchev, bango nyonso, basengeli na Klisto, na libatisi ya Molimo Mosantu. Ekobongola bizaleli na bango. Ekosala ete bato oyo bango balingaka te, bákóma bandeko. Ekolongola lokósó, nkanza pe koswana; pe ekopesa bolingo, esengo, kimia, boboto pe mawa.

<sup>88</sup> Iyo, ntango mosusu, ezalaka na bisika oyo okanisaki te, nde okozua eloko oyo ozali koluka.

<sup>89</sup> Bana ya Yisalaele balingaki kopesa nini (biloko nyonso oyo bazuaki na Ezipito) ntango bibebú na bango ekómaki kobimisa makila, ntango lolémo na bango ebimaki libanda na monoko? Bakokaki ata kopesa wólo nyonso oyo bazuaki epai na bato ya Ezipito, mpo na kópo moko mpamba ya mai kitoko ya mpio. Bakambi na bango, na bilíkí, bazalaki kokamba bango longwa na esika moko ya mai kino na esika mosusu ya mai, longwa na mabulu kino na máziba, kasi nyonso wana esilaki kokauka.

<sup>90</sup> Tala na mpwasa, na mbongo te to ya ofele! Mongongo elobaki na mosakoli pe Elobaki: “Loba na libanga,” eloko ya kokauka koleka na bilíkí, eloko ya mosika na mai koleka. Kuna nde mposa na bango ya mai esilaki, na mbongo te to ya ofele. “Loba na libanga.” Kofuta libanga te, kasi “loba na libanga.”

<sup>91</sup> Kino na mpokwa ya lelo, Azali bobele Libanga yango. Azali Libanga na mokili oyo ekaúká. Soki ozali kosala mobembo na mokili oyo ekaúká, loba na Libanga. Ozali na ntina ya kofuta Ye te; loba na Ye. Pe Azali lisungi mpenza, oyo ezangaka te na ntango ya mpasi. Soki ozali na bokono, loba na Libanga. Soki ozali na bokono ya masumu, loba na Libanga. Soki olembi, loba na Libanga.

<sup>92</sup> Bomoni, emonanaki lokola ete ekozala na bisika nyonso. . . Emonanaki lokola ete, soki mai ezalaki te na bisika ya mike oyo ezalaki na máziba, mai elingaki pe kobima te, likolo na ngomba wana, na libanga. Nzambe asalaka makambo na lolenge oyo ekeseni mpenza na oyo bato bakanisaka. Libanga, esika oyo ekauká koleka na bilíkí, kasi Alobaki: “Loba na Libanga.”

<sup>93</sup> Lelo, bato bazali kopengwisama mingi. Bakanisaka ete soki bakoki kokende kosambela, kofuta sánzó moko boye mpo ásámbela mpo na bango, nde bakokota mpo bafuti. Soki batongí ndakonzambe moko ya monene na esika moko boye, pe soki mozui moko apesi mbongo mpo na kotonga yango, kasi akobi kobika na bilúlélá, azui moto mosusu mpo ábondelaka mpo na ye, akanisi ete ekoki. Nzambe azali na ntina ya mbongo na yo ya mbindo te. [Ndeko Branham abeti eteyelo mbala misato—N.D.E.] Nyonso oyo Ye alingi, ezali ete ópesa Ye bomoi na yo pe óloba na Ye. Nzambe apésá yo mbongo, kosilisa yango te mpo na biloko oyo etondisaka te. Salela yango mpo na biloko oyo etondisaka. Kasi mpo ótónða mpenza, ekoki kosalema te, soki naino olobi na Libanga te.

<sup>94</sup> Abimisaki mai oyo epesaka bomoi, na mbongo te to ya ofele. Pe bamelaki, bakaméla na bango pe emelaki, bana na bango pe bamelaki, kino lelo, ezali kaka líziba yango, oyo etiolaka na bilíkí.

<sup>95</sup> Ndenge moko pe lelo Azali Libanga, na mokili oyo ekaúká, mpo na bato oyo balingi kokufa. “Moto nyonso oyo akondimela Ngai akokufa te, kasi akozua Bomoi na Seko.”

<sup>96</sup> Bótála. Mpokwa nyonso, bazalaki na ntina ya komitungisa te mpo na lípa. Mpokwa nyonso, bazalaki komemela bango lípa, ya sika.

<sup>97</sup> Lelo, soki tokei kosomba lípa. Soki ozali mosengi-sengi, okei na magazin, pe olobi: “Nazali na mposa ya lípa.”

<sup>98</sup> Akoloba: “Lakisa ngai liboso centime na yo ntuku mibale na mitano. Nasengeli kozua centime ntuku mibale na mitano mpo na lípa oyo.”

<sup>99</sup> Bongo ozui nini ntango ozui yango? Yango ekotónðisa yo mpenza te, kasi ozui eloko ya moke koleka, na oyo blé ekoki kopesa. Balongolaka vi—vitamine nyonso, mposo ya mbuma nyonso, mpo na kopesa yango na ngulu. Basangisaka potopóto moko boye, oyo esangisaka bamposo yango esika moko, bayúngulaka yango, pe basalaka lípa, na maboko ya bosoto, ya mbindo, mbala mingi. Bomoni biloko oyo bokútaka na kati ya mápa na bino, mbala mosusu, biteni ya suki, ná biloko ya nsoni, biteni ya bilamba, ná biloko nyonso mosusu oyo ekweyaka na kati ya pate ya mápa wana. Basumuki ná bokono ya sopísi, pe nyonso wana, esangani kati na yango. Soki omoni ndenge basalaka yango, okolinga ata kolia yango te. Kasi, ata

bongo, okofuta centime ntuku mibale na mitano, soki te, okozua yango te.

<sup>100</sup> Kasi Nzambe azalaki koleisa bango mpokwa nyonso, na mápa oyo esalemi na maboko ya Banje; na mbongo te, ya ofele. Pe, lelo, mápa yango ezalaki kotalisa Klisto, Bomoi ya molimo, oyo akitaki uta na Likolo, mpo na kopesa Bomoi na Ye.

<sup>101</sup> Pe, mokolo na mokolo, Nzambe apesaka bana na Ye lobiko ya sika. Bozali komikanisela, soki babombi lipa yango kino na mokolo elandi, ezalaki kobeba.

<sup>102</sup> Soki oyoki moto moko azali koloba: “Ee, nazali na . . . Tika náyébisa yo. Nazali Lutherien. Nazali Presbiterien, Batiste. Nazali Pantekotiste,” wana ezali bobele lípa ya kala, oyo esalemi na maboko ya moto. Suka yango wana, ezali mpenza na mbindo, pe esalemi na maboko ya bato.

<sup>103</sup> Kasi soki oyoki litatoli ya likambo oyo moto abikeli, ya sika: “Na ntongo ya lelo, na libondeli, Molimo Mosantu euti kobatisa bomoto na ngai ya kati,” oh, ndeko na ngai, wana nde Bilei ya Banje. Aleisaka bango bilei ya sika, mokolo na mokolo, uta na Likoló.

Tosengeli na mbula ya mapamboli.

Matangá ya mawa ezali kokita epai na biso,

Kasi tozali kosenga mbula.

<sup>104</sup> Oh, iyo, tinda yango uta na Likoló, ya sika, Nkolo, Klisto Lípa ya Bomoi. Kotisa Yango kati na motema na ngai, pe tika ete násepela na Bozali na Ye ya nkembo.

<sup>105</sup> Na ntembe te, bazalaki kozongisa matondi. Bazalaki kozongisa matondi. Pe mobali to mwasi nyonso, oyo abotami na Molimo ya Nzambe, pe azui Molimo Mosantu, akozongisa matondi ntango nyonso. Ata soki likambo nini esalemi, okozongisa matondi.

<sup>106</sup> Lokola mwana mobali wana, mokufi miso, kuna na bangomba, Benny, abótámá bongo. Ntango akómaki penepene na sanza mwambe, maladi ya cataracte ebandaki kokóla na miso na ye. Baboti na ye bazalaki babólá. Bazalaki kofanda na mopanzi ya mwa ngomba moko ya mabelé ya ntóki. Pe bayebaki ete lipasó yango ekokaki kobikisa miso ya Benny, mpo ákoka komona. Akómaki mwana mobali ya mibu penepene zomi na mibale. Baboti na ye bazalaki kozua bobele mwa moke oyo ekokaki kosomba lípa ná mosuni, ya mobu mobimba. Bakokaki kofuta lipasó yango te.

<sup>107</sup> Bazalani nyonso, bango nyonso, bazalaki komona ndenge Benny azalaki komeka kosakana elongo ná bana mike kuna, ná miso ya kokufa. Azalaki komona te makambo oyo azalaki kosala. Bazalaki koyokela ye mawa. Pe na mobu wana, moko moko na bango abukaki mbuma ya elanga mwa mingi koleka. Basalaki mosala ya bilanga mwa makasi koleka, na nse ya mói makasi.



Pe, na eleko ya automne, ntango batekaki mbuma ya bilanga na bango, bazuaki mbongo, batiaki Benny na engunduka, pe batindaki ye epai ya monganga.

<sup>108</sup> Basalaki lipasó yango pe elekaki malamumu. Pe ntango azongaki, bazalani nyonso basanganaki, ntango Benny akitaki na engunduka. Mwa miso na ye ezalaki kongenga. Abandaki kogánga pe kolela, ntango azalaki kotala bilongi na bango.

<sup>109</sup> Moko na bakambi alobaki: “Mwana, ofuti ntálo boni mpo na lipasó yango?”

<sup>110</sup> Alobaki: “Misie, nayebi te soki bato oyo bafuti ntálo boni. Kasi nazali na esengo monene ya komona bilongi na bango, baoyo bafuti ntálo yango.”

<sup>111</sup> Tomiyokaka nde ndenge wana. Nayebi te soki Nzambe afutaki Ntálo boni. Nayebi ete Apesaki ngai eloko ya malamumu koleka oyo Ye azalaki na yango, Mwana na Ye. Kasi nazali kozongisa matondi mingi ya kozala na miso ya molimo, na lolenge ete nakoki kotala Ye na elongi pe koyeba ete Akufelaki ngai. Nayebi te soki Afutaki Ntálo boni. Tozali na makoki ata moke te ya koluka koyeba yango. Ntálo yango eleki monene. Nayebi ndenge esalemi te. Kasi nazongisi matondi. Nazongisi matondi, mpo, wana nazalaki mokufi miso, sikawa nakómi komona.

<sup>112</sup> Nazongisi matondi mpo ntango Bandeko Mayo bayébísáká ngai ete ntango na ngai ekomaki na suka, ntango minganga bayébísáká ngai ete nakokaki lisusu kozala na bomoi te, eleki mibu ntuku mibale na mitano, lelo, nazali na bomoi. Nayebi te soki Nzambe afutaki ntálo boni, kasi nazongisi matondi mpo nazali na bomoi.

<sup>113</sup> Kala, nazaláká mosumuki, nakangámáká na masumu, na mawa na motema, nazaláká kobanga liwa. Kasi, lelo, liwa ezali elonga na ngai. Aleluya! Ekomema ngai bobele Liboso na Ye oyo nalingá, mpo námona elongi na Ye. Abongolaki likambo yango, na nzela na lipasó, Azuaki motema na ngai pe Akómisaki yango ya sika. Nayebi ete eloko moko ekómelaki ngai.

<sup>114</sup> Na eleko ya automne oyo eleki, na zulunále moko, na Minnesota. Mwana moko ya mobali azuaki veló na ye pe akendeki na losambo, na eteyelo ya lomingo na ntongo moko. Elenge mobali mosusu, pembeni na bango, azalaki na ntina ya eteyelo ya lomingo te, azuaki moninga na ye ya mwasi pe bakendeki kopatiné likolo ya glas. Mobali yango azalaki mokóló, bongo akómaki epai glas ezalaki moke pe akweyaki. Autaki kotiola mwana mobali wana, na ntongo wana, ntango azalaki kokende kuna, ayebisaki moninga na ye ya mwasi, alobaki: “Bato oyo bakendeke na losambo wana, bazali bato ya bilandá-landa.” Pe ntango akweyaki na kati ya mai ya glas, moninga na ye ya mwasi azalaki mosika na ye. Mwasi yango azalaki nzoto mike; akimaki. Kasi ntango amataki likolo ya mai pe atiaki maboko

likolo ya glas, azalaki lisusu koningana te, pe asimbaki glas makasi.

<sup>115</sup> Moninga na ye ya mwasi amekaki kopesa ye maboko mpo ásimba, kasi mwasi akomaki na bozito mingi koleka, azalaki kobúka glas. Abelelaki mwasi: “Zonga sima! Zonga sima! Soki kaka okwei na mai, biso nyonso mibale tokozinda.” Abelelaki, alelaki, kasi eloko ya kosunga ye ezalaki te.

<sup>116</sup> Sima na mwa ntango, kuna, likolo na ngomba, mwana mobali moko azalaki koya na veló, azalaki kotambwisa, ná Biblia na nse ya lipeka. Ayokaki kogánga yango, pe abakisaki mbangu ya mwa veló na ye. Akitisaki Biblia na ye na nse, pe apotaki mbangu likolo na glas yango. Azalaki komibenda na mwa libumu na ye, ná bilamba na ye ya kitoko na nzoto, kino ntango akangaki maboko ya mobali yango, pe abandaki kobenda ye sima-sima, kino ete abimisaki ye libanda na glas. Abimaki na balabala pe atelemisaki motuka moko. Babengaki ambulance pe bamemaki ye na lopitalo.

<sup>117</sup> Sima na ye kokende kofuta ambulance, kofuta minganga mpo na batonga ná ba-nkisi mosusu oyo azuaki mpo na bokono ya pneumonie, ayaki kokutana ná mwana mobali yango. Alobaki: “Mwana, nasengeli kopesa yo nini?”

Alobaki: “Eloko moko te.”

<sup>118</sup> Alobaki: “Nasengeli kopesa yo bomoi na ngai.” Bókanisa naino. Mbongo ekokaki kosomba yango te. Ezalaki likambo ya bomoi na ye.

<sup>119</sup> Ndenge wana nde tosengeli komiyoka epai na Nzambe. Ezali likambo ya kofuta mbongo mpo na kozua eloko moko boye te; kasi tosengeli nde kopesa Nzambe bomoi na biso, mpo tozalaki kokufa pe tozalakai kozinda na libulu ya masumu. Nzambe azingaki ngai na maboko pe na mokóto na Ye.

Nazalaki kozinda na bozindo ya masumu,  
 Mosika na libóngo ya kimia,  
 Mbindo ekotaki na bozindo kati na ngai,  
 Nazalaki kozinda, nakokaki lisusu kobima te;  
 Kasi Nkolo ya mbu yango  
 Ayokaki kolela na ngai, elikia na ngai esilaki,  
 Abimisaki ngai na mai,  
 Sikawa nabatelami.

<sup>120</sup> Nasengeli kopesa Ye bomoi na ngai. Bosengeli kopesa Ye bomoi na bino. Bosengeli kopesa Ye bomoi na bino, mpo na kosalela Ye; ezali te kopesa yango, bongo ókende kokumisa ebongiseli ya lingomba na bino; ezali te kokende kotóna bamosusu; kasi mpo na koluka kosalela pe kobikisa bamosusu, pe mpo na komema bango na boyebi ya Nkolo Yesu Klisto.

<sup>121</sup> Mwana oyo asakanaki na mbongo. Mpo na kosukisa, nakoki koloba boye. Ntango asilaki kobebisa bozui na ye nyonso, bozui

ya tata na ye, na bomoi ya motomboki, pe ntango azalaki kozonga na ndako. . . Akómaki kolala na lopango ya bangúlu, nde makanisi ya malamú ezongelaki ye. Alobaki: “Ebele ya basali ya Tata na ngai bazali na mbongo mingi ya kotia pembeni, bongo ngai nazali kokufa, na nzala awa.” Bongo soki ámekaka koloba: “Nazali komituna, soki nazalaki na mwa mbongo, oyo nabebisaki na mitelengano na ngai, nakokaki kozongisela yango papa?” Kasi ayebaki ezaleli ya tata na ye, pe alobaki: “Nakotelema pe nakokende epai ya tata na ngai.”

122 Tata alobaki te: “Zela naino, mwana! Olingi kozongisela ngai mbongo na ngai?” Te. Atángelaki ye masumu na ye te. Asepelaki ndenge azalaki kozonga. Asepelaki ndenge makanisi ya malamú ezongelaki ye, mpo azalaki mwana na ye. Azalaki mwana na ye moko. Asepelaki ndenge azalaki kozonga na ndako. Sikawa, asepelaki na lisumu na ye te, kasi asepelaki ntango makanisi ya malamú ezongelaki ye pe alobaki: “Nasali lisumu liboso na Nzambe, pe liboso na tata na ngai. Nakotelema pe nakokende epai na ye.”

123 Pe ntango amonaki ye, na mosika, apotaki mbangu epai na ye pe ayambaki ye. Pe alobaki: “Bóboma mwana-ngombe ya mafuta,” na mbongo te. “Bóyá na elamba oyo eleki kitoko,” na mbongo te. “Bóyá na lopété,” na mbongo te “bólatisa ye yango na mosapi. Tólia, tómela pe tósepela, mpo mwana na ngai oyo abungaki pe sikawa amonani. Akufaki, pe azongi na bomoi. Tósepela mpo na yango.”

124 Bótika náloba boye, baningá na ngai, mpo na kosukisa. Eloko bobele moko oyo etondisaka, biloko ya solosolo mpenza oyo ezali, biloko ya malamú mpenza oyo ezali, ekoki kosombama na mbongo te. Ezali makabo ya ofele ya Nzambe, na nzela na Yesu Klisto; lobiko ya bomoto ya kati; esengo. Bóya, bólia pe bótóna.

*Mpo na nini bokosilisa mbongo mpo na eloko oyo ezali lípa te? pe mpo na nini bozali koboma nzoto mpo na eloko oyo etóndisaka te? bóyóka ngai na bokebi, pe bólia . . . oyo ezali malamú, pe molimo na bino ésepela mpenza na biloko ya mafuta.*

*Bósémbola matoi na bino, pe bóyá epai na ngai: bóyóka, pe molimo na bino ekotikala na bomoi; pe ngai nakosala na bino kondimana ya seko, oyo boboto na ngai mpo na Dawidi.*

125 Biloko nyonso oyo eumelaka, biloko nyonso ya malamú, biloko nyonso oyo esepelisaka, biloko nyonso oyo ya Seko, ezalaka ya ofele, pe okofuta eloko moko te. Na suka ya Buku oyo, Elobami ete: “Moto nyonso oyo alingi, áyá komela Mai ya liziba na Bomoi, ya ofele,” na mbongo te, ya ofele. Mpo na nini bozali kosilisa mbongo na bino mpo na biloko oyo etóndisaka te, pe bozali kotika biloko ya solosolo oyo etóndisaka mpenza, ya ofele, éleka, kozanga ete bino moko bóyebá motuya na yango?

## Tóbóndela.

<sup>126</sup> Wana bofandi kimia pe bozali kobondela. Na ndako oyo, na ntongo ya lelo, bato bazali, oyo bazali komela na liziba yango te, baoyo mposa ya mokili ezali naino na bomoi na bino, pe, na ntongo ya lelo, bolingi kobongola esika na bino ya komela mai, to lolenge ya kosalela mbongo na bino? Bolingi koya kosomba epai na Nzambe, (na mbongo te, ya ofele), mafuta ya nzoi ná míliki, bisengo ya vinyo? Okoki kotombola loboko, koloba: “Kanisa ngai, Ndeko Branham, wana ozali kobondela”? Nzambe ápambola yo, misie. Nzambe ápambola yo, misie. Nzambe ápambola yo, ndeko mwasi. Bamosusu bazali, oyo bakoloba: “Kanisa ngai, Ndeko Branham, wana ozali kobondela”?

<sup>127</sup> Bamosusu kati na bino bilenge, iyo, oyo bosili kobebisa bomoi na bino. Ba—ba—bangonga oyo mama ná papa balekisaki na mabondeli mpo na yo, mateya nyonso oyo bazalaki koteya yo, kasi ata bongo, obwakaki yango pembeni, mpo na koyoka nungúnungú ya zaboló. Sikawa okómi na mposa ya mizíki ya mokili, makambo ya mokili. Pe makanisi ya malamú ekómi kozongela yo, lokola mwana wana, na lopango ya bangúlu. Okolinga kotombola loboko, ndeko mwasi, ndeko mobali, mpo na koloba: “Nzambe, kanisa ngai. Sala ete makanisi ya malamú ézongela ngai, na ntongo ya lelo, tika ete náyá na ndako ya Tata”? Okofuta ata eloko moko te. Azali kozela yo. Ata soki osalaki nini: “Ata soki masumu na yo ekómi motane, ekokóma pembe lokola matándálá; motane lokola ngóla, ekokóma pembe lokola nkunza.” Bazali nde Liboso na Nzambe, baoyo bakotombola maboko na bango?

<sup>128</sup> Baoyo bazali na bokono pe na bosenga, báloba: “Na—nakweyaki na libulu. Satana a—anyokoli ngai. Akómisi ngai ebósono pe apesi ngai bokono, to eloko moko ya ndenge wana. Na ntongo ya lelo, mposa na ngai ezali ete, monyolólo ya kondima ya Nzambe ékóta na motena na ngai, mpo ébimisa ngai na libulu oyo, lokola mobali oyo azalaki pembeni na ekuke oyo bazalaki kobenga Kitoko.” Bótómbola maboko. Nzambe ápambola moko moko na bino.

<sup>129</sup> Nkolo, na ngonga oyo, namemeli Yo bato oyo batomboli maboko, mpo na bolimbisi ya masumu na bango. Ozali Nzambe, pe Nzambe bobele moko. Kaka na bisika oyo bafandi sikawa, na bisika yango nde Outi kolobela bango. Na bisika yango nde Outi kondimisa bango ete bozali na libunga, ntango Liloba ezui esika na Yango, pe Molimo Mosantu abandí koyebisa bango, pe koloba: “Ozali na libunga. Baluka pe zonga epai ya Nzambe Tata.” Pe batombolaki maboko mpo na kotalisa ete bazalaki na mposa ya kobima na lopango ya bangúlu ya mokili oyo, mpo na koya na ndako ya Tata, epai biloko etóndi, epai bazali na ntina ya komema eloko moko te. Ndenge moyembi alobi yango malamú ete: “Namemi eloko moko te na maboko na ngai, nakangami bobele na ekulusu na Yo.” Tika ete báyá, malembe-malembe, na

komikitisa, pe bákweisama pe bápésá bomoi na bango. Pe Okoya na elamba oyo eleki kitoko; ná lopété, mpo na kolatisa bango na mosapi; pe léísá bango Mana ya Mwana-mpate oyo abomamaki. Sala yango, Nkolo.

<sup>130</sup> Bamosusu bazali na bokono pe na mpasi. Bazali na bosenga. Satana abwaki bango na libulu, na ntembe te, bazangi mbongo ya lipasó. Na ntembe te, ntango mosusu mingi kati na bango bakokaki koleka na lipasó te. Ntango mosusu monganga akokaki kolongola bokono yango te, ata soki azalaki na mbongo ebelé mpenza. Kasi Yo ozali Nzambe. Pe nabondeli ete, na ngonga oyo mpenza, na nse ya epakweli ya Molimo Mosantu oyo ezali awa sikawa, ete Óbíkisa moko moko na bango. Tika ete bábíkisama, kobanga na mitó na bango kino na makolo na bango, na eteni ya moke nyonso.

<sup>131</sup> Soki bazangi esengo; lobiko na bango, bazali lisusu na esengo na Yango te. Ndenge Dawidi alobáká, kala, ete: “Pesa ngai lisusu esengo ya lobiko na ngai.” Tika ete báýamba esengo pe básepela, na esika ya mawa pe ya bolembú na bango, mpo Ozali Libanga kati mokili oyo ekaúká. Ozali ebombamelo na ntango ya mopepe makasi. Wana zabolo akobeta bango na bokono pe masasi ya ndenge na ndenge, Ozali ebombamelo na ntango ya mopepe makasi. Tika ete ésalema bongo, lelo, Nzambe, mpo tosenge yango na Nkombo na Yesu. Amen.

Yesu azali kobenga yo na malembe, na bopolo,  
Azali kobenga ngai na yo;  
Atako tosalaki masumu, Azali na mawa pe na  
bolimbisi,  
Bolimbisi mpo na ngai pe mpo na yo.  
Zonga na ndako . . .

<sup>132</sup> Sikawa soki olingi, yaka kofukama na etumbelo, tokoki kobondela elongo na yo, kopakola yo mafuta, nyonso oyo tokoki kosala. Okoki na yo koya.

. . . olembi, zonga na ndako;  
Yesu azali kobenga, kobondela yo na bopolo,  
Azali kobenga, E mosumuki, zonga na ndako!

<sup>133</sup> Bolingi Ye? Teddy, okoki kotinda loyembo oyo: “Nalingi Ye, nalingi Ye mpo Alingaki ngai liboso.” Okoki kozua yango?

<sup>134</sup> Tóýemba yango mpo na nkembo na Ye, liboso ete tóbóngola molongo ya liyangani, mwa moke. Oyo nde kokumbamela. Nsango esili kopesama. Nasepeli mingi ndenge boyambi Yango. Nabondeli ete Ézala litómba mpo na bino, mpamba te koteya Yango ezalaki litómba mpo na ngai. Nabondeli ete bobele mpémélá oyo epesamelaki ngai, mpo nátéya bino Yango, bóyamba Yango bobele na mpémélá oyo Yango etindamelaki. Tika ete Nkolo ápambola Yango na mitema na bino. Malamu.

Nalingi Ye,

Sikawa, bókanga miso, wana tozali koyemba. Bótómbola maboko.

Nalingi Ye  
Mpo Alingaki ngai liboso  
Pe Asombi lobiko na ngai  
Likolo na Ekulusu.

135 Sikawa tógúmba mitó, tóyémba na nse ya mongongo. [Ndeko Branham abandi koyemba na nse ya mongongo *Nalingi Ye*—N.D.E.] Bolingi Ye? Azali solosolo mpo na motema na yo, boye te? Eloko moko ya solosolo mpenza ezali kuna, mpo na Ye, boye te? Nalingi Ye mpo Alingaki ngai liboso, Abwakelaki ngai Nsinga, uta na Kalvari, mpo na kobikisa ngai, Akangisaki Yango na motema na ngai.

136 Bóbósana te, Ndeko Kurmmond [Drummond] moto akoteya biso na mpokwa ya lelo, ezali mpokwa ya elámbo. Soki olingi Nkolo, yaka kolia elámbo awa, elongo na biso. Soki Nkolo alingi, nakozala awa, elongo na bino. Azali bokiló ya Ndeko Tony Zabel; Ndeko Thom ya Afrika; mwana na ye, elenge mobali malamamu; Moklisto malamamu mpenza, ya makasi, elenge motei malamamu.

Mpo Alingaki ngai liboso  
Pe Asombi lobiko na ngai  
Likolo na Ekulusu.

137 Sikawa, wana togumbi mitó, wana piano ezali kobeta.

138 Nkolo Yesu, tolingi kobanda mosala mosusu, Nkolo. Totondi Yo mpo na Molimo Mosantu oyo elobi na mitema na biso. Pe tosepeli, Nkolo, ndenge Osali yango mpo na biso. Pe tika ete Liliba na Yo ézonga mpamba te epai na Yo, kasi tika ete Ekokisa likambo oyo Yango esengelaki kosala. Tika ete Étikala na mitema na biso nyonso, mpo na koyeba ete biloko nyonso ya solosolo pe biloko nyonso oyo eúmelaka eútaka nde epai na Nzambe, na mbongo te, ya ofele. Na bongo, mpo na nini tóbunda-bunda mpo na biloko, pe tókómisa yango likambo ya bomoi-to-kúfa, mpo na biloko oyo ekobeba? Tika ete tóbunda koleka, Nkolo, mpo na biloko oyo ekobeba te, oyo ezali na ntálo te. Ntálo na yango efútámá ofele, pe moteki azali kobelela: “Moto nyonso oyo alingi, áyá.”

139 Pambola eteni ya mosala oyo ezali kolanda. Sala yango, Nkolo. Zalá na biso elongo na mpokwa ya lelo. Pambola mosala ya libatisi. Tika ete kosopana monene ésálema. Tika ete bato oyo, bakozua libatisi na Nkombo ya molingami Mwana na Yo, Nkolo Yesu, tika ete bátóndisama na Molimo Mosantu. Tika ete bato oyo, batombolaki maboko, mpo na koyambola masumu na bango, na ntongo ya lelo, tika ete báyá kolata bilamba ya libatisi pe bákóta na ebatiselo, mpo na kotalisa polele na mokili ete balimbisami na masumu na bango. Pe bazali kozua libatisi mpo yango élongolama na buku. Sala yango, Nkolo.

<sup>140</sup> Zalá na Ndeko Kurmmond [Drummond] na mpokwa ya lelo, ntango akoteya biso liteya oyo euti sikawa na Ngwende. Pakola ye na Molimo Mosantu. Pe zala na biso ntango tokolia elámbo. Tika ete mitema na biso ézala mpenza peto, tika ete mbindo ézala kati na biso te. Tika ete Makila ya Yesu épétola biso na masumu nyonso. Sala yango, Nkolo. Longola bokono kati na biso, pe pesa biso esengo pe kimia. Tosengi yango na nzela na Yesu Klisto. Amen.

Nalingi . . .

<sup>141</sup> Bolingi Ye? Sikawa bótómbola maboko epai na Ye.

Nalingi Ye

Mpo- . . .

Sikawa sembola loboko pe pesa mbote ya loboko na moto oyo azali pembeni na yo.

Liboso . . .

(Russell, nalingi Ye. Soki nakufi lelo, nalingi Ye.)

Pe Asombi . . .

Malamu, sembola bobele loboko nzinga-nzinga pe pesa mbote ya loboko.

. . .lobiko

Likolo na Ekulusu . . .

Malamu, Ndeko Neville, ndenge akoloba. Malamu.



*NA MBONGO TE TO YA OFELE* LIN59-0802

(Without Money Or Without Price)

Liteya oyo ya Ndeko William Marrion Branham, eteyamaki liboso na Ngelésá, mokolo mwa lomingo na ntongo, mokolo mwa 2, sanza ya mwambe, na mobu 1959, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2018 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)